

欽定剿平三省邪匪方略

欽定剿平三省邪匪方略正編卷一百八

己未年

七月初一日

丁巳高杞奏言

臣

連日輪流差探賊

匪卜三聘張添倫等股均自奉節漸入巫山

帶並有在巴巫河西岸高山瞭望因河水阻隔

未能涉渡查河之東岸距巴東西瀼邊卡尙有

一百八十餘里雖隔溪河兩道但水勢長落不

定

臣

與成德王凱督飭各卡兵勇晝夜偵防斷

不敢稍有疎懈致被闖入並聞勒保派員帶兵
緊躡逼剿賊若不能過河必又西走大寧該處
毗連鄖屬房竹倭什布在彼防堵甚嚴賊匪無
路可遁川省大兵自更易於得手奏入

上命軍機大臣傳諭高杞曰川東竄匪距楚境尙遠
現當伏秋水漲之時溪河阻隔賊匪未能徑渡有
成德王凱督兵在彼足資防堵然亦須時刻留心

嚴防不可稍有疎懈現在荊門等處被有水災是
巡撫應辦之事高杞著卽馳往撫卹辦竣後卽回
武昌不必又至歸巴軍營也

同日

上諭內閣曰國家設兵衛民各按地方形勢以定額
數多寡備操防巡緝之用不可稍有短缺自剿辦
教匪以來各省多有征調其在軍營打仗出力兵

丁拔擢弁員者甚多將來凱旋歸伍時自不敷原
設兵額前已諭令各省督撫提鎮召募新兵除河
南陝西四川雲南募兵較多所缺無幾毋庸議外
其餘各省著查照派出征兵現缺之數酌量召募
直隸山東應先補十分之五山西甘肅廣東應先
補十分之四江西廣西應先補十分之三貴州應
先補十分之七務須挑選健壯實力訓練庶兵額

不致久懸地方亦藉資彈壓

初三日

己未

明亮與肇奏言張漢潮股匪經官兵

痛剿後翻越秦嶺向陳家溝西河一帶漏夜狂

奔每日竄至一百四五十里

臣

等尋踪緊躡察

其所向總依林箐望五郎竄走一經官兵趕上

卽翻山亂竄十一日探得賊匪至樓里溝地方

臣

明亮連夜帶領馬隊翻山抄擊趕上賊匪後

隊箭斃五十餘名餘衆望老林遁走衝散矛手
三百餘人向羅逢溝奔竄該處離鎮安甚近前
因山東新兵初來不慣捷走派鎮臣長春在商
州收齊由鎮安緩行前進當卽飛飭該鎮就近
帶領搜捕分散餘匪以清後路臣等仍督兵追
擊連日兼程進發該匪至蘆草溝復又分出二
百餘人在兩山密林內潛匿希圖乘間騷擾官

兵後路

臣

因追剿喫緊未能兼顧復又飛派侍

衛莫新遊擊胡定泰等帶領兵勇搜捕將林內

賊匪趕殺三十餘人餘俱逃竄十四日賊匪竄

近五郎適接永保來信途次接松筠知會張映

祥一股竄至徽縣兩當勢欲奔赴鳳縣恐復梗

塞棧道因帶兵轉往攔截未克前來協剿

臣

前

准勒保派撥恒瑞暨富成兩路官兵內抽出之

三千名趕來協剿亦尙未到惟陝甘補額新兵
一千五百名內有五百名先到漢中適鎮臣木

騰額自四川太平病愈來營永保卽派令帶赴

五郎協同臣前派鎮臣關騰攔截十六日賊匪

竄過五郎木騰額帶兵趕到該逆未敢屯紮連

夜竄至四畝地臣等卽將新兵五百名令關騰

管帶跟踪追剿十七日馳抵四畝地探得賊匪

在金竹溝焚掠離

臣

營尙隔六十里遂連夜發

兵

臣

明亮督率愛星阿富蘭等帶領馬隊由瓦

寨抄道進發

臣

興肇督率墨爾根額木騰額等

帶領步兵由平溪河前進黎明察看路徑均係

重山複嶺樹木森密復派關騰帶兵由山梁望

哨行走詎該匪狡繪異常每於箐林施放鎗礮

希圖牽綴官兵俾首逆得以乘間遠颺

臣

一面

飛飭遊擊游棟雲應元寬等上山幫同關騰用
劈山礮向深林轟擊一面督催官兵追擒首逆
老林匪匪爬山遁走經關騰等在山梁擊斃七

十餘人生擒十七名餘匪奔及山口

臣明亮督

率馬隊馳射擊殺

臣

興肇趕到前後圍剿殺斃

一百餘名生擒賊目徐學乾等三名並餘匪八

十四名殘匪一百餘人翻山竄走訊據獲賊供

稱張漢潮年老不能管事賊營中悉聽冉學勝
高玉春徐潮李潮等指使從前張漢潮率領
大夥人馬尙不敢與官兵打仗今矛手等因落
後不能覓食商量分出各找一路行走是以張
漢潮等一見官兵即捨命向無兵處所奔逃並
不與官兵對敵今因官兵追殺甚緊矛手又少
恐官兵趕上躲避不及冉學勝令徐掌櫃帶領

四五百人藏在樹林內乘間衝出使官兵前後不能相顧若能得手冉學勝等趕回幫助張漢潮帶領男婦老幼先已逃走當將賊目徐學乾等三名戮割並從賊打仗殺人者二十七名均卽正法其餘被擄未久者發交知府趙洵分別保釋臣等飛卽督兵追擊該逆率領餘匪尋覓險仄山徑遁逃因連日大雨河水漲發凡有經

過浮橋悉皆拆毀臣等現在設法趕緊紮筏渡

河緊躡進剿張逆現由華陽二郎壩一帶向江

口奔竄並不據掠亦不停留察探踪跡係前往

棧道武關馬道舊竄之路今永保正在棧道堵

禦慶成經松筠等奏明囑由北棧前進若張漢

潮西竄即可會剿並可迎截張映祥東竄之路

臣等惟期乘此機會速滅此股卽稍有餘匪竄

逸不日亦即可併力掃除奏入

上命軍機大臣傳諭明亮曰此次明亮等抄截張漢潮股匪前後殺賊一百餘名生擒賊目三名並餘匪八十餘名所辦尙好惟摺內稱賊匪漏夜狂奔每日竄至一百四五十里一經官兵趕上卽翻山亂竄所言似不確實前聞逆在豫受傷折回西竄何以尙能如此狂奔且所奏張漢潮年老不能

管事賊營悉聽冉學勝高玉春徐潮李潮等指
使一節尤屬取巧張漢潮久爲此股緊要賊首官
兵追剿多時賊勢已就窮蹙乃首逆尙未拏獲忽
又另改賊目別出多名卽使張漢潮就擒不過摺
內少此三字逆名而新出餘黨愈剿愈多何時方
能殲盡看來明亮等添此數賊名姓竟係爲事後
餘匪未清地步此等軍營陋習尙未肅除淨盡若

似此往來追剿稽延時日每次奏報惟以乘機滅
賊套語塞責閱之彌覺生厭豈伊等竟欲久握兵
權不思及早竣事耶明亮等如敢仍前玩悞朕當
執法從事不能如從前再邀寬貸矣

上又命軍機大臣傳諭慶成永保曰張漢潮股匪經
明亮跟踪追躡並派鎮將等分投截擊現向棧道
武關馬道一帶奔逸永保本由城固前來協剿因

接松筠知會張映祥一股竄至徽縣兩當勢欲奔
趨鳳縣永保卽帶兵轉往攔截並未赴明亮一路
而慶成前奏亦馳往漢中與永保會合專顧棧道
是慶成永保之意俱不願與明亮剿辦張漢潮一
股祇以堵禦張映祥爲辭同在漢中一帶竟置張
漢潮於不問張映祥雖有折回鳳縣之勢但甘境
現有廣厚吉蘭泰在邊界防堵而恒瑞離甘境不

遠亦可就近截擊又益以慶成永保則共有四五
人在彼防堵至張漢潮一股祇有明亮一人在後
追躡試問軍營剿賊機宜有如此多寡不均者乎
卽使防守棧道堵截張映祥事關緊要慶成永保
二人亦當分一人赴明亮軍營幫辦斷無二人俱
赴徽縣兩當一帶之理朕親政以來慶成永保受
恩雖淺而受

皇考多年養重恩寧不
廼思報效現在距奉移

山陵之日不遠伊等若能
激發天良認真剿辦將張漢
潮張映祥等股賊匪殲獲無遺於未奉移以前卽
奏捷音庶可仰慰

皇考在天之靈成朕之孝贖汝之罪朕必加之懋賞倘
再心存畛域不知公忠體國植黨忌功以致賊匪
不能速滅伊等自思從前尙有和珅爲之庇護任

其玩愒遷延倖逃重罪此時尙有何人敢爲之緩
頰耶軍營積習及帶兵諸臣之各存意見或彼此
猜忌或互相比周皆朕所深悉倘經此次訓諭之
後尙不痛加悛改以軍務爲重將來執法以繩斷
不能曲加寬宥也

同日吳熊光奏言

臣

欽奉

諭旨令籌堅壁清野之計伏查豫省西南邊境一帶

與陝楚接壤之處悉係層嵐疊嶂其間村落間
斷零星自數家至數十家不等惟稍近腹地之
村莊烟戶較爲稠密臣於巡防往來之際間遇
衿士耆老亦曾詢及挖濠築堡集勇禦寇之方
據稱盧氏浙川內鄉地方本處民人均在附郭
一帶居住山中並無土著皆係外來貧民搭棚
棲止墾種山地一聞賊至卽裹挈遷避無由糾

集其鎮市等處亦多係山陝商賈邇年來因賊
匪叠次焚搶攜貲回籍山徑之中水石環繞人
力難施且人少亦不足守而坡下村莊稍大又
因地廣工鉅人心不齊難於備禦向來聞有賊
警近山者避入山中近城者移居城內賊踪所
過雖食物未勉拋棄而生命不至被戕是以沿
邊一帶安寧義勇尚有由省城及鄧州等處僱

覓前來此豫省西南邊境之地勢民情也惟是
窮簷勞苦薄有田廬猝被賊氛不免遭其蹂躪
仰蒙

聖主軫卹民艱恩膏渥沛而閭閻蕩析情形總未得
保護萬全之策茲荷

聖慈指示容

臣

督飭所屬曉諭衿耆人等相度地形

從長計較可行則行可止則止斷不許假手吏

胥致滋煩擾總期於禦賊安民有裨現據探報
張漢潮一股賊匪尙在山陽鎮安一帶奔竄此
時明亮慶成等各路大兵分投兜截諒可迅速
蕲功而陝境賊氛一日未靖卽豫省邊防一刻
難弛臣惟有督飭鎮將實力嚴防並與地方各
官悉心籌畫以冀疆圉肅清民生安定再遵查
上月張漢潮衝撲界嶺時守備楊景芬率領兵

丁施放鎗礮奮力轟擊賊遂折由里漫坪翻山
竄越其時各兵連環並進轟打倉猝之際但見
賊衆敗退亦未知張漢潮已經中傷迨訊據獲
賊供稱始知張漢潮欲衝上界嶺被官兵烏鎗打
傷經賊夥搶回之語茲復傳詢該守備楊景芬
據稱是日截剿賊匪時守備僅帶兵三百名因
佔住險隘令衆弁兵一齊向前放鎗力擊一時

烟焰薰騰其張逆所中之鎗係何弁兵所放實在不能確指惟查本營內步兵司魁榮平日打鎗準頭最爲純熟彼時擊賊亦屬超衆奮勇

臣

思行軍賞罰尤關重大不敢因奉獎賞之

旨遂任冒功轉致無所懲勸謹將實在情節覆奏
入

上命軍機大臣傳諭吳熊光曰堅壁清野之計總當

審度地勢情形再行辦理以禦賊安民豫省可
行與否惟在酌量妥辦朕亦不能遙制至張漢洵
股匪尙在山陽鎮安奔竄其意總欲由豫入楚該
撫務須督飭所屬留心嚴防不可稍有疎懈現在
明亮慶成分股兇剿張逆該撫一得望獲之信卽
行迅速馳奏至守備楊景芬一路官兵鎗傷張漢
潮雖無確証究能擊退賊眾未令深入豫境尙屬

出力楊景芬如果再有出力之處著以應陞之缺
先用

初五日辛酉倭什布奏查竹谿邊界前將屢撲

西面河卡之張起貴一股賊匪擊退後旋因大

寧一股賊匪竄至徐家壩逼近竹谿之西溝竹

山之張公橋等處當即飭令副將孫清元于總

黃宮國各帶兵勇分路策應臣於太平關居中

訓度十五六等日登據探報又有賊匪一股亦
自大寧竄抵徐家壩其前自西面河敗退之賊
復南竄會合又前竄川陝交界之兩扇門八仙
河等處賊股亦俱由川陝邊界東竄蟻聚於徐
家壩虎溪溝一帶均有進逼楚境之勢臣查自
竹山張公橋至竹谿西帶六百餘里山徑叢岐
犬牙相錯今賊股接續紛來或分投窺伺或併

力衝突賊勢較重派有孫清元黃富國兩路兵
勇尚恐單弱而各卡防兵又以同在戒嚴未便
抽撤因復酌量緩急於梓桐垵卡抽調兵三百
名鄉勇一百名於竹谿關卡酌調五百名以備
策應十七日該匪果分一股由長嶺溝竄擾張
公橋分一股由甘溝竄擾六河田分一股由蕭
家坡竄擾西溝其竄擾張公橋一股經守備羅

陞帶領兵勇截剿斃賊四十餘名生擒九名該
匪不能抵拒敗回徐家壩其竄擾大河田一股
經千總黃富國帶領鄉勇頭人朱大倫等迎前
堵截殺賊十餘名該匪亦卽折退惟竄擾西溝
一股係大夥賊隊十七日黎明先有二千餘人
撲擾卡座經駐防該處之副將銜遊擊揆明率
同兵勇施放鎗礮堆放滾木擗石擊斃賊匪三

十餘名滾巖跌傷者亦數十名該匪撲上三次不能進逼正在相持之際適副將孫清元率兵趕到賊卽退去次日該匪復來侵擾孫清元揆明率兵壓剿詎賊人詭計一見官兵卽退入對山老林逾時又吶喊衝出并恃人數衆多日夜更番逼擾查該處原設防兵五百名合之孫清元帶往策應之兵只有千名晝夜抵剿不遺餘

力其時所調竹葉關防兵以山路紆遠不能趕

到臣卽於所帶兵七百名內撥五百名令守備

張霞舉姜元祥帶往協剿併飛催所調梓桐壩

兵勇連夜趕往至二十一日匪衆愈集愈多二

十二日黎明該匪會合衆股約萬餘人一擁而

上有二千餘人圍撲營卡餘俱從兩旁老林並

無路徑之所漫山奔突孫清元揆明率兵突圍

衝擊與賊匪攪殺一處短及相接揆明往來衝
盡力竭陣亡把總馬中魁亦受傷殞命兵丁受
傷陣亡者亦多孫清元奮力殺出重圍該匪望
前狂奔官兵刀砍矛戳孫清元追至山後前竄
之賊由龍潭灣溝內奔竄適守備張震舉姜元
祥千總蘇朝陞等帶兵趕上紮住溝口截殺該
匪因後有孫清元追擊整隊派出千總蘇朝陞

黃文珍直前迎截俱受傷陣亡該匪竄至松樹
坪黃泥壩一帶屯聚時已昏黑官兵卽在對面
山梁紮住二十三日賊人分五股來撲山梁孫
清元等帶兵迎剿約有兩時之久始將賊匪壓
退千總孫餘慶把總徐秋魁王萬岱俱以首先
壓下被賊戕害該匪現竄豐溪東北之高子河
一帶臣查高子河地方東可達竹山縣境北可

侵逼竹溪縣城而南面邊外尚有前竄張公橋
大河田兩股賊匪往來窺伺又據防守梓桐壩
之總兵路超吉稟報平利境內之藍家山八仙
河等處亦有另股賊匪奔竄須防接續闖入現
在竹溪閬邑士民紛紛赴營求臣督兵保衛縣

治臣酌量情形賊人趨向未定縣城兵守空虛

民心未免惶惑臣酌帶官兵六百名暫赴縣城

東南九里崗扼堵以定民心飭千總黃富國帶
練勇一千名截其東竄竹山之路飭孫清元張
霞舉姜元祥吳純俊仍帶策應兵一千名跟踪
進擊飭總兵路超吉督率沿邊各卡嚴防邊外
續來之匪查西面河一卡離西溝不遠今賊匪
已由西溝闌入繞在西面河之內該處毋庸駐
兵守禦臣因飭守備王有將西面河守卡兵勇

帶至九里崗堵截

臣

俟該守備到來捍衛縣治

有人卽行湊集兵力并飛催廣西兵丁到營親自帶領相機進剿惟現在兵丁實屬不敷已咨商勒保酌量派撥但恐緩不濟急再查各路防兵房縣邊界有卜三聘龔文玉張添德等股逼近鄖西邊界有張漢潮一股尙在山陽鎮安等處逃竄均在堵守喫緊之時未能抽調臣惟有

就現有兵勇鼓勵將士趕緊截剿不使深入楚境連日剿殺賊匪約有六七百名生擒曹賢明等十三名逐一審訊據供此股賊匪係李樹徐添德張起貴宋歷子四股曾在一處內李樹宋歷子等皆籍隸襄陽董意竄回原籍徐添德等因川省逼剿緊急是以會合一路前來該匪等俱係久經從賊之人當卽正法節次打仗兵勇

以少禦衆間有陣亡另容查明咨部奏入

上命軍機大臣傳諭倭什布曰現在各股賊匪闌入楚境已有萬餘人而南面邊外及平利一帶亦有賊匪往來窺伺各路防堵均關緊要倭什布係總督大員不可因賊已入境稍行惶惑亦不可身臨行陣冒昧輕進况賊匪必經之地該督已預設卡座賊來衝撲時兵單賊衆將并兵丁等俱能奮力

接戰陣亡甚多可憫之至尙非倭什布守禦不嚴
之咎此時朕亦不加責備倭什布當處以鎮靜督
率兵勇實力截剿毋使賊匪深入所有此次打仗
之遊擊揆明往來衝盪力竭陣亡殊屬可憫著咨
部加等賜卹又陣亡千總蘇朝陞黃文珍孫餘慶
把總馬中魁徐秋魁王萬岱均著咨部議卹至倭
什布軍營兵數本少守卡剿賊未免衆寡不敵現

擬籌酌添兵又恐緩不濟急著該督先將陣亡兵丁所出之缺卽行募補倘尙不敷調派仍當量爲增募以壯軍威將來事竣奏銷時卽使部臣按例議駁朕必格外施恩特加允准斷不肯計較銷銖致令賠累也

上又命軍機大臣傳諭勒保曰倭什布奏各股賊匪共有萬餘人分路撲卡經各員弁奮勇迎剿自遊

擊以至把總陣亡者共有七員兵丁傷亡者亦多
可見堵禦不爲不力總緣楚省邊界兵單寡不敵
衆而川省官兵不能緊躡追剿予賊以暇以致匪
衆闌入非倭什布之過實勒保之咎也至川北賊
匪徐添德一股本係德楞泰剿辦嗣據勒保奏於
德楞泰現帶官兵內撥出六千名交賽沖阿李紹
祖分剿卽李樹等股勒保亦必有派令專剿之員

何以川省並不認真繞截任聽賊匪狂奔入楚且
倭什布摺內祇稱川匪被剿緊急會合一路前來
並未提及川省有兵追躡尤不可解勒保身爲經
畧川楚陝豫軍務皆應通盤籌畫今賊匪竄出川
省而勒保卽置之不顧如此漫無調度尙得謂之
經畧耶勒保著傳旨嚴行申飭况德楞泰賽冲阿
李紹祖等非四川守土之臣旣經派令專剿川北

賊匪何以並不跟踪追躡入楚著勒保查明奔竄
楚省之李樹徐添德張起貴宋慶子四股現在究
係何人追剿卽令各帶原有之兵速赴竹山竹谿
幫同倭什布奮力截擊戴罪立功不可再任深入
楚境倭什布自北而南川省帶兵之員自南而北
兩路夾擊若能殲盡此四股賊匪則該員等縱令
川匪入楚之罪尙可自贖倘再觀望怠玩必按軍

律治罪再前據松筠等奏官兵來往剿賊爲時已
久衣敝履穿并有用牛皮裹足者朕閱之深爲憐
憫軍需動支款項有一定則例原不許額外濫用
但亦不可因例難開銷過事苛刻今從征者前有
鋒鏑之危後有飢寒之困何以使之效命疆場克
敵致果耶軍營一切賞需自應畧爲寬裕加之體
卹使士馬飽騰人思敵愾而發揚蹈厲之氣更可

壯軍容而寒賊膽矣此時京中大臣斷無人敢掣
軍營之肘惟軍需報銷一事部中不得不按例核
算然果大功速竣卽有例外動用之項朕自當酌
核情節特加恩准與其費省而歲事稽延無寧費
多而成功迅速勒保不可預存將來賠累之見致
有刻覈也

臣等謹案軍儲爲國計所關司出納者固當

加等慎重而官兵供億之需尤不可過從刻
覈此次剿辦邪匪前三年間三省請

帑已不下數千百萬率因各路軍營煩費無度未
免冒支濫應之弊

皇上整飭戎綱叠經

勅詢稽查始得漸歸撙節而奉行不善又或慮干核

減育意從苛仰蒙

聖明洞遠鑒微以官兵衣敝履穿

憫其從征之苦

特命經畧加以體卹寬以賞需並

諭以例外動用款項自當酌核往銷

仁心

仁聞實足鼓士氣而感休嘉豈僅投醪挾纊之比哉

上又命軍機大臣傳諭伯麟吳熊光曰現在湖北竹

山竹谿等處堵剿川匪兵力不敷山西現在存營
兵有二萬一千餘名著伯麟於此項存兵內挑選
壯健兵丁三千名並派曾經出師及素能管束兵
丁之將弁等分起帶領取道河南迅往倭什布軍
營聽候調遣並著吳熊光卽飭經過各地方官於
晉兵過豫時妥爲應付照料俾得按起遄行速至
楚省以資剿賊之用

初六日

壬戌

勒保奏言查再添元等股匪衆前經

額勒登保於川洞子木老壩等處節次剿殺後

向鎮龍關一帶奔逸欲與王登廷竄合而王登

廷屯踞馬鞍寨不時遣人在後路阻我糧運額

勒登保先派副將褚大榮帶兵二千餘名在長

壩王家壩一路來往疏通復派副都統阿哈保

副將穆克登布帶領馬步隊由草壩場進發額

勒登保率領總兵楊遇春等由洪口進發初三
日五更齊至馬鞍寨分路競上立將寨門攻克
該匪慌亂奔逃官兵乘勝掩殺額勒登保卽帶
兵繞至劉家河抄截正值匪衆涉水回竄將賊
衝爲兩股其未過河者大半俱被殲戮統計殺
賊四百餘人滾巖淹斃者七八百名生擒湯勇
成等一百六十三名訊據供稱再添元宋永富

連口遣人約會王登廷令其赴王家壩清花溪
一帶阻絕太平通江兩路糧運額勒登保一面
卽留阿哈保等搜捕餘匪續獲任漢志等八十
六名隨向水洋坪追剿王登廷賊股一面親督
鎮將等於初八日趕至清花溪探得冉添元等
竄赴王家壩一帶滋擾初九日賊匪竟來分撲
褚大榮及遊擊劉朝貴等營卡正在相持適額

勒登保兵到賊匪見卽潰奔我兵乘勢追剿殲
獲一百餘人賊向團包山竄去額勒登保分兵
兩路於十一日追至二仙山該匪等在對面山
梁搖旗吶喊率衆抗拒官兵奮勇搶撲賊勢頓
却直追至黃土坪沿途殺賊三百餘名生擒賊
目魏大元並匪衆一百十二名餘匪又向竹峪
關奔逸而王登廷一股由劉家河竄入東鄉經

知縣楊世鰲帶領團勇在雙河場堵禦適值賊
匪竄來卽與阿哈保官兵兩面夾擊又斃賊一
百餘人該匪等由方山坪木頭市一帶狂奔現
入大竹縣境額勒登保以王登廷屢次窺伺後
路糧運最爲狡詐必須先滅此股庶不致被其
牽綴並恐阿哈保等兵力稍單卽從鎮龍關一
路兜剿前進至德楞泰一路官兵自安寺坪將

張添倫等股匪衆剿敗後因連日大雨溪漲將
偏橋衝塌糧米不能運送幸於二十六日搭起
偏橋移至大竹河該處並無船隻直至初一日
水勢稍退始得踰淺過河兵勇騾馬間有覓水
被衝者探知龍紹周樊人傑徐添德等俱由高
坪黃墩一路竄入大寧老林山內而張添倫尙
在修溪壩一帶游奕卽可就近剿辦德楞泰於

初四日整兵前進初六日遇賊於拖板嶺地方
阿穆勒塔賽沖阿帶領馬兵首先衝入賊隊殲
斃騎馬賊匪六人步賊五六十人步兵繼進追
殺二十餘里又斃賊一百餘人生擒劉敏等三
十八名投出難民八十六名賊衆由花椒壩一
路奔竄經派防該處義勇首聶愈煥等率勇截
剿又鎗斃賊目劉道新並賊匪二三百名餘匪

向渡口場折竄官兵跟踪追躡初十日行抵栢
枝山探報張添倫亦竄入老林而附近八台山
又有賊匪屯踞乃係辛聰顏中考等股隨於十
一日五更分兵兩路進剿該匪等一聞兵到率
衆數千直前抵拒德楞泰督催官兵奮勇衝撲
衆賊奔潰沿途追殺二百五六十人生擒汪長
壽等六十一名時值大雨未得窮追德楞泰以

此股賊匪較衆卽分兵由榨井壩溫湯井一路
兜截又朱射斗自開縣之九龍山追及包正洪
一股匪衆痛剿之後賊勢愈形窮蹙由火焰壩
欲竄溫湯井因我兵繞至賊前賊又向楊柳石
一路折竄初十日趕上賊尾殺斃七八十名生
擒趙倫等五十七名復由靈官廟馬家營一路
竄去追我兵於十二日至馬家營聞有賊匪正

在圍攻附近之中成寨天槽洞朱射斗卽分兵
馳往截擊該匪等亦分兩路前來迎拒斃賊雖
多而賊竟恃衆不退相持兩時風雨驟至官兵
冒雨直前奮力衝殺斃賊一百餘名又追殺十
餘里斃賊三四百人生擒張元得等八十九名
投出難民男婦三百二十一名口訊係辛聰一
股被德楞泰擊敗之後與顏中考分騷竄至馬

家營欲奪寨砦暫紮不料又遇官兵剿殺至包
正洪並未與此股合夥已向雞鳴寺竄逸臣查

馬家營雞鳴寺等處均離溫湯井不遠今包正

洪辛聰等既向該處奔竄而德楞泰朱射斗兩

路官兵正可會同夾擊臣已飛札飭催德楞泰

等必須趁此機會先將該匪等迅速辦完再辦

別股又夔州巫山兩處本有提督七十五總兵

德英額分駐堵剿卜三聘一股屢次窺伺夔門
初一初六等日滋擾草塘河張家村等處經七
十五帶領兵勇擊退兩次斬獲百餘人及四五
十人其自平利竄來之李全一股欲由巫山竄
出楚境因界嶺營卡嚴密不能竄逸並經大寧
場團勇協同官兵併力迎剿斃賊二百餘名該
匪現由湯家壩折竄有仍回平利之勢而鮮大

川張子聰等尙在通江西鄉之老林內出沒游

奕臣已疊飭王文雄慶溥柯藩等務須實力堵

截毋任蔓延甘肅白號賊匪先已竄出畧陽欲

回川境經松筠永保派令遊擊楊國林等帶兵

一千六百名前往追躡現據廣元縣稟報該匪

等由神宣驛大道折入後山曾家河一帶臣已

嚴飭派防該縣之遊擊尤漢玉帶領兵勇約同

楊國林等兩面進攻以收夾擊之効刻下藍號之賊尙在階州寧羌連界之楊家壩等處臣已

知會恒瑞如果與廣厚吉蘭泰之兵會合剋日

剿滅固屬甚善否則一併逼入川北境內則甘

境肅清可令廣厚吉蘭泰帶兵防堵恒瑞卽同

索賈英阿之兵赴川協剿至張漢湖一股現由

豫境折竄商維

臣

又飛催明亮慶成永保務須

厚集兵力趕緊剿除陝省腹地之患楚省
二鄖二竹以及歸巴一帶經倭什布高杞周布
營卡聲勢頗覺聯絡屢據各路獲犯訊供似不
敢卽行東竄臣又諄囑倭什布等務須隨時嚴
飭各卡協力堵防不可予賊以隙臣惟有督飭
各路帶兵諸臣策勵將士趕緊剿辦

勒保又奏言臣查廣興押解末起餉銀五十萬

兩於六月初五日行抵達州

臣

因現在白塔壩

地方相距不遠卽於是日馳赴達州城外詢悉
此次餉銀因北棧有賊竄擾客有阻滯幸蒙

皇上燭照機先派員分起管押又經永保帶兵拏卡
前進得保無虞現將二百五十萬兩均分撥成
都達州保寧三局兌收並無短少舛錯情事廣
興卽於初九日起身回京其已圖魯侍衛綸布

春等十七員除明亮永保在陝各留四員外尙

有安祿等九員均已解餉到川臣在達州軍需

局雖爲糧餉重地然城守綦嚴可無須該員等

在此保護現在額勒登保德楞泰兩路軍營舊

有之巴圖魯侍衛等員帶兵俱係熟手且皆出

力並無怯懦無能之人惟額勒登保一路有侍

衛烏爾呼訥自上年因病留養興安經臣疊次

查催雖據報起程至今尙未見到恐有藉病逗
遛情弊一俟該侍衛到營查明再行據實核辦

臣

就現到巴圖魯各員內查得安祿三音庫車

森保額爾特依薩寧阿五員人俱勇幹卽分派
額勒登保德楞泰兩路以資帶兵其鄂尼保伊
里布巴彥泰巴三泰四員或年歲太老或各有
殘疾若留在軍營帶兵打仗恐不甚得力是以

一并令其回京

臣謹將前用之

欽差大臣關防一顆交鄂尼保等賫送回京以昭愼

重

勒保又奏言

臣

查軍營動支銀兩款項本屬繁

多而各營支用銀數俱以兵數之多寡為準且

自

臣

到川以來節次遵奉

諭旨大加節省現在各軍營不敢再有浮冒以

臣

一

路而論各路官兵均歸總統凡有應領軍餉大半俱由臣處隨營總理糧員支放兵數既衆則

用項較多而額勒登保一路有在達州局隨時

撥解者亦有在臣營就近支用者均無浮濫卽

德楞泰一路亦然臣營及額勒登保軍營支領

之例一律核支實無領銀獨多之事惟各路官

兵分合靡常增減不定其中支用糧餉起止月

日細數一時驟難劃分清楚而支發均有冊檔
文領可憑將來自無從冒混福寧之與德楞泰
屢次齟齬者緣由兩人素有嫌隙德楞泰每遇
前敵糧餉偶有缺乏卽連次發信嚴催而福寧
恐其叅奏卽先發制人預佔地步將撥解銀數
率爾竄陳又未將本年兩次給發銀二十萬兩
係找補去年欠項前後牽算各緣由明白聲敘

是以奉

旨飭查不能指出實據以致徒煩

聖心總之德楞泰之咎不在餉項之支領浮多而在
剿賊之不能得手查數月以來各股賊匪均竄
入大寧老山林內德楞泰帶兵深入往往追剿
此股卽遇彼股竄來雖經疊次殲殺而輾轉牽
綴總不能辦完一股並致龍恩周闕入陝疆此

實德楞泰之咎臣所以不卽奏叅者蓋緣帶兵

大員固須智勇兼備不得已而思其次亦須久

歷行間聲望素著足以獨當一面庶官兵聽其

指揮如明亮德楞泰皆尙有聲望前次臣將明

亮帶兵遲緩情形據實密奏實因帶兵乏人是

以祇懇

聖恩嚴飭催剿未卽効叅今德楞泰較之明亮尙覺

勇往認真並無怠玩貽悞情事合無仰懇

聖恩俯念帶兵乏人暫從寬宥如德榜泰果能迅速

剿滅一兩股自可稍贖前愆倘再有遷延卽當

具摺叅劾

臣蒙

恩畀以重任於帶兵各員功過刻刻留心考覈祇知
以

國事爲重諸凡惟有據實直陳斷不敢稍涉瞻顧

更不敢姑容悞事均奏入

上命軍機大臣傳諭勒保曰現在川省竄匪已由大寧西溝一帶闖入楚境勒保豈尙毫無信息且閩摺內所奏惟額勒登保追剿王登廷一股殲賊多名一聞冉添元有約會王登廷梗阻糧運之信卽親督鎮將等馳赴王家壩堵剿又殺賊數百人復會同阿哈保兜剿前進似此奮勇殺賊實心爲國

出力者各路軍營中祇見額勒登保一人至德楞
泰剿辦張添倫等股匪衆因大雨溪漲糧運不繼
官兵必致受餓實爲可憫德楞泰帶兵追剿冬日
雖先後殲賊數百名而賊匪仍輾轉奔竄況此時
已縱放徐添德等由西溝闌入楚省將逼竹溪而
摺內猶稱竄入大寧老山林內豈賊匪奔竄踪跡
尙未之知此皆德楞泰之罪其餘帶兵之朱射斗

七十五等不過在後尾追並未見奮勇出力而勒保惟知飛札飭催並嚴飭派防員弁協同剿擊卽爲伊之調度豈不可笑又安用此經畧爲哉再昨據倭什布奏平利境內賊匪已由藍家山一帶欲接續入楚而勒保摺內尙稱巫山一帶營卡嚴密不能竄逸並稱楚省二鄖二竹等處經倭什布等周布營卡聲勢聯絡如此措詞勒保竟尙在夢中

猶以諄囑倭什布協力防堵爲言尤爲不知恥矣
勒保著傳旨嚴行申飭又據另摺奏廣興等所解
餉銀行抵達州勒保因相距不遠卽馳赴達州將
解到餉銀分撥收貯據伊所言勒保竟係安坐軍
需局料理各路文報之章京耳尙得謂之經畧耶
且據稱達州軍需局城守綦嚴可毋庸安祿等在
彼保護然則該處又何用勒保爲之保護豈勒保

以餉銀全到卽可任其揮霍乎惟所奏額勒登保
一路有侍衛烏爾呼訥因病留養屢催未到恐有
藉病逗遛情事俟查明核辦一語所奏尙是如果
有前項情弊自應嚴叅辦理又據稱帶兵各員功
過刻刻留心考核祇知以國事爲重等語此言朕
不能信勒保統理軍務以來毫無調度朕用爲經
畧深愧乏知人之明惟當引以爲咎現在正當剿

賊緊要之時惟以殄平賊匪爲重卽福寧與德楞
泰互有嫌隙此時朕亦姑置不問俟成功後伊二
人功過具在無難據實核辦也至軍需報銷固應
慎重今亦不望伊等多有節省惟望各矢天良以
期大功速竣如果能剋期平賊卽有例外動用之
項朕自當酌核壯銷也至勒保剿辦賊匪總以不
必添兵爲言朕方謂其辦有把握可期得手今爲

日已久而賊匪轉有增無減是勒保不必添兵之
奏祇係偏執已見殊不足恃昨已降旨於山西添
調兵三千今又於盛京挑選兵丁二千名令副都
統額勒亨額帶領前赴川陝以資協剿勒保旣偏
執於前以致賊匪蔓延竄擾今又添此生力勁兵
若再不悉心調度實力剿辦以期迅速歲事勒保
之罪尙可追乎

上又命軍機大臣傳諭胡季堂曰昨盛京副都統額勒亨額來京已諭令速卽回任曾同將軍琳寧挑選盛京健壯兵丁二千名卽令額勒亨額帶領前赴川陝協剿邪匪將來該兵丁等經過直隸所有應行預備車輛飯食等事著胡季堂先期從容備辦以便到境遄行